



## JOM PI IPOH!

Wan Nur Shaziayani & Fuziatul Norsyihah



### Lost World of Tambun



Untuk menggembirakan hati keluarga, terutama anak-anak yang semakin membesar, percutian adalah salah satu cara untuk merapatkan hubungan keluarga. Maka destinasi yang dipilih oleh kami sekeluarga adalah Ipoh, Perak. Tempat yang dituju adalah Lost World of Tambun. Aplikasi KLOOK merupakan aplikasi yang saya gunakan untuk membeli tiket secara atas talian. Harga yang diberikan murah dari di kaunter tiket Lost World of Tambun.



Tips yang saya boleh berikan adalah, sebelum masuk ke taman tema ini, kita perlu bersarapan kerana makanan tidak boleh dibawa masuk serta makanan di dalam agak mahal. Selain itu, pastikan bekalan air kosong dibawa dengan kadar yang mencukupi untuk ahli keluarga. Setiap permainan adalah percuma dan boleh bermain seberapa banyak yang kita mahu, tetapi untuk rumah hantu terdapat bayaran yang dikenakan.



## Kellie's Castle



Kellie's Castle merupakan salah satu tarikan utama di Ipoh. Bangunan ini dikaitkan dengan sejarah dimana bangunan pertama yang memiliki lif di Tanah Melayu. Ia dibina pada tahun 1905 dan merupakan lambang cinta William Kellie Smith kepada isterinya Agnes. Bangunan ini juga mempunyai 14 buah bilik, sebuah bilik bawah tanah dan terowong rahsia.



Keunikan Kellie's Castle adalah pembinaannya tidak menggunakan simen atau paku. Oleh kerana tiada simen maka campuran putih telur itik, gula merah, pasir, madu dan kapur digunakan. Bangunan ini juga, mempunyai bentuk seni bina berdasarkan seni bina india yang berdiri kukuh lebih seabad sehingga ke hari ini. Kellis's Castle membuatkan anak-anak seronak serta teruja kerana dapat meneroka setiap ruang rahsia yang terdapat di dalam bangunan misteri ini.



Tips yang saya boleh berikan semasa hendak melawat ke Kellie's Castle adalah, pastikan anak-anak memakai pakaian yang agak nipis dan selesa kerana jika tidak hujan, cuaca agak panas dan tidak selesa. Memandangkan bangunan ini sudah lama, ibu bapa perlu memastikan anak-anak di bawah pengawasan mereka, kerana tangga bangunan ini agak curam. Bahagian atas bumbung juga boleh dilawati,namun pastikan anak-anak dijaga kerana bimbang mereka jatuh atau sebagainya.



Tasik cermin di Ipoh semakin menjadi tarikan kepada pelancong-pelancong yang datang ke Ipoh terutamanya pelancong yang suka bergambar sambil melayan keindahan semula jadi yang cantik.



Tasik cermin yang terletak di Gunung Rapat ini ialah tasik yang tersorok dikelilingi bukit batu kapur. Ia dipanggil sebegitu disebabkan atas permukaan air, bayang bukit terpantul, seolah-olah seperti cermin.



Untuk memasuki Tasik Cermin ini, anda perlulah melalui kawasan tanah merah dan sedikit berbatu terlebih dahulu kerana tasik ini berada di kawasan kuari. Jadi, sekiranya hujan amatlah tidak digalakkan datang ke sini. Selepas anda memakir kereta, anda perlu berjalan kaki lebih kurang 70 meter ke dalam gua untuk sampai ke tasik tersebut. Bayaran yang dikenakan adalah dewasa RM2 dan kanak-kanak RM1.



## Lubuk Timah Hot Spring



Pusat Rekreasi Lubuk Timah ini merupakan tempat pencarian bijih timah pada masa dahulu dan kini ia menjadi antara tempat yang best untuk bersantai bersama keluarga sekiranya datang ke Ipoh. Keunikkan Lubuk Timah ini adalah terdapat air sungai yang sejuk dan juga kolam air panas bersaiz sederhana.




Di sini terdapat pondok-pondok kecil yang perlu disewa untuk berkelah. Namun anda juga boleh menghampar tikar di mana-mana kawasan yang bersesuaian di tepi sungai. Selain itu, tempat ini juga dilengkapi dengan tandas, surau dan kafe.



Selain bersantai bersama keluarga, di sini juga sesuai untuk seseiapa yang ingin mengadakan "family day" atau "team building" kerana terdapat juga chalet untuk bermalam.



Bayaran untuk masuk ke sini, dewasa RM5 dan kanak-kanak RM3. Pada hujung minggu, tempat ini wajib sesak. Datanglah awal untuk pilih "port" yang best untuk berkelah.



## Tempat Makan Best



Dah jalan-jalan, perut pun mesti lapar kan? Di sini saya kongsikan tempat makan yang saya pernah cuba makan di Ipoh. Sarapan pagi anda boleh cuba makan di **Suhaimi Kafe**. Antara menu yang ada di situ adalah seperti mi kari, aneka menu yang berdasarkan roti benggali seperti roti benggali telur goyang dan roti benggali kari ayam, pelbagai jenis spaghetti dan lain-lain lagi. Bagi minuman pula, untuk pencinta kopi dan yang rindukan kopi Vietnam, disinilah tempat yang anda perlu cuba. Harga berpatutan dan kafe dibuka dari pukul 7.45 pagi sehingga 12.00 tengah hari. Tutup hari selasa.



Untuk makan tengah hari, anda boleh cuba makan di **Restauran Pakcik Wong Young Tau Fu**. Restauran cina muslim yang menyajikan pelbagai jenis makanan dan pilihan lauk seperti Creamy Butter Chicken, Black Pepper Beef, Salted Egg Squid dan banyak lagi. Harga juga berpatutan dan mula operasi pada pukul 12.00 tengah hari sehingga 10.00 malam setiap hari.



Makan malam pula, kami telah cuba di **Warung Anak Kampung MZ**. Warung ini tidaklah viral tetapi mempunyai ramai pengunjung. Menu utama di sini adalah masakan panas dan western. Disebabkan ramai orang, servis untuk masakan panas agak lambat bagi saya. Walaubagaimnapun, anda jangan risau kerana anda boleh memesan makanan sampingan terlebih dahulu seperti sate, yong tau fu dan otak-otak. Sate dan yong tau fu memang sedap sampaikan kami order sebanyak dua kali. Harga juga berpatutan dan warung beroperasi dari pukul 4.30 petang sehingga 12.00 pagi. Tutup hari Khamis.

